

RAPPORTERING PÅ TILSKOT «KULTUR AMATØR» SAKSNUMMER 2016/2418

Tweensfestival 2016

Gjennomføring:

Tweensfestivalen 2016 vart arrangert på Rossabø i Haugesund helga 28.-30.oktober 2016. Hovudlokalitet for festivalen var Rossabø kyrkje, med innkvartering på Håvåsen skule.

Arrangementet er eit årleg tiltak, og er eit samarbeidsprosjekt mellom KFUK-KFUM Bjergvin og KFUK-KFUM Haugaland. I år var det KFUK-KFUM Haugaland som hadde vertskapsansvaret. Tema for festivalen spegla KFUK-KFUM sitt slagord «Ver deg sjølv. Stå opp for andre». Vi la både vekt på at alle er gode nok akkurat som ein er skapt, at vi saman kan gjere kvarande gode, hjelpe kvarandre og hjelpe vår sysken i andre land som ikkje har det så godt som oss.

Tweensfestivalen er eit helgearrangement for barn (tweens) mellom 10 og 13 år. Vi ser på denne festivalen som særst viktig fordi «tweens» som aldersgruppe er ei gruppe som lett kan falle utanfor dei tilboda som er for barn og unge i kyrkjelege samanhengar, då tweens kan kjenne seg for store til å gå i barnekor/-klubb, men er for små til å vere med i Ten Sing grupper/ ungdomsklubbar. Vi ønskjer å gi denne aldersgruppa eit programtilbod som er tilpassa deira aldersgruppe både i innhald og utforming, som er kjekt, inspirerande, lærerikt, utfordrande og utviklande – og då er tweensfestivalen eit viktig arrangement. Deltakarane og leiarane gir uttrykk for at tweensfestivalen er eit viktig arrangement i tweensgruppene sitt årshjul, det skapar mykje glede blant barna, der dei får møte andre barn på same alder, med same interesse, får nye vennar, for utfalde seg på sine premiss i trygge og gode fellesskap.

I år deltok 46 barn, 18 leiarar og frivillige medarbeidarar, i tillegg til musikarar, teknisk crew og seminarleiarar. I tillegg hjelpte nokre foreldre til med praktiske gjeremål. Vi hadde i utgangspunktet håpa at festivalen skulle trekke fleire deltakarar til arrangementet, men håper å få det til neste år. Dei barna og leiarane som var med hadde ei flott og innhaldsrik helg!

Festivalen har eit godt og variert program. I KFUK-KFUM legg vi vekt på at vi er heile menneske, med ånd, sjel og kropp – og at vi treng å bruke heile oss for å føle oss som eit heilt menneske, og dette kjem også fram i programmet for festivalen, der det er både fysisk aktivitet, fagleg påfyll, åndeleg påfyll og ro for sjel og sinn.

Etter innkvartering og kveldsmat på fredagskvelden starta vi festivalen med opningsshow med underhaldning og allsong. Barna storkosa seg. Deretter roa vi ned med kveldsavslutning. Før leggetid hadde alle gruppene soveposesamling på klasseromma, der barna fekk reflektere over dagen og forventingar til helga. Vi snakka om korleis dei hadde det, kva som hadde vore gøy å vere med på og om det var noko som dei grua seg til eller

var spente på. På denne måten hjelper vi dei til å finne roa og verte tryggare på seg sjølv og gruppa dei reiser saman med.

Laurdagen er «hovuddagen» på festivalen, med variert program frå morgon til kveld. Dagen starta med morgonshow, som gjekk over i «singspiration» der alle deltakarane saman øver som festivalkor og øver på songar som dei mellom anna skulle opptre med på gudstenesta på søndagen. Etter dette var det seminartid, og barna kunne velje mellom følgjande seminar: Dans, Lego/brettspill, solist/minikor, hobby/kreativ, drama og baking. På seminara jobba deltakarane med mellom anna å førebu ulike innslag til gudsteneste søndag. Til dømes så laga hobby/kreativ ulike dekorasjonar til å pynte kyrkjerommet med, dramagruppa laga dramastykke knytt til preiketeksten («Sonen som kjem heim») og solist/minikor øvde inn ein av fellessongane som dei var solistar på. Etter seminarøker og lunsj var det klart for konsert med Espen Fernando (kjent frå MGP Junior). Dette var ei overrasking for deltakarane som vart særst godt motteke. Neste post på programmet var «Globallop». Globallop er eit konsept utvikla av KFUK-KFUM Global, der løparane samlar inn pengar til Globalaksjonen vår. Årets globalaksjon går til Sri Lanka KFUK. Nesten alle barna, og fleire vaksne deltok, og mange hadde funne seg mange sponsorar, og det vart samla inn over 21.000 kr. Det er vi veldig stolte av! Saman kan vi bidra til at verda vert litt betre for dei som lever i fattigdom og naud. Slitne, men nøgde barn fekk så taco-middag før det var ei ny økt med «singspiration». Deretter var det klart for den programposten som var eit av dei store høgdepunkta for mange av deltakarane, nemleg «kampkveld!» Dette er eit aktivitetskonsept som kombinerer show, konkurransar og leik, der deltakarane vert delt inn i lag som konkurrerer mot einannan i ulike leikar, utfordringar og konkurransar. Det var stort engasjement og konkurranseinstinkt! Kvelden vart avrunda med kveldsavslutning med andakt, og deretter soveposesamling på klasseromma.

Søndagsmorgon gjekk med til pakking, rydding og førebuing til gudsteneste. Deretter deltok festivalen på gudstenesta i Rossabø kyrkje, der foreldre og kyrkjelyden fekk glede av å sjå kva barna hadde jobba med gjennom helga.

I KFUK-KFUM vektlegg vi ungt ansvar – vaksen nærvær. Mange av medarbeidarane som var med på festivalen var ungdommar og unge vaksne, mellom 16 og 25 år. Mange av ungdommane går på leiarkurs i KFUK-KFUM (LIV – ledere i vekst kurs). Festivalen hadde også ein arrangørkomité bestående av frivillige som hadde ansvar for store delar av gjennomføring av festivalen, under tett oppfølging av dagleg leiar i KFUK-KFUM Haugaland og programarbeidar for barn og tweens i KFUK-KFUM Bjørgvin.

Tweensfestivalen var særst vellukka, og vi har fått mange gode tilbakemeldingar frå både leiarar og deltakarar om at dei har hatt ei flott festivaloppleving og gleder seg til neste år!

Prosjektrekneskap:

Inntekter

Deltakaravgifter	26800
Hordaland Fylkeskommune kultur amatør tilskot	8000
Sum inntekter	34800

Utgifter

Leige av lokale	0
Mat	6018
Programutstyr	1788
Lyd og lys	7500
Admin.kostnadar	4574
Reisekostnadar	920
Estimerte lønskostnadar	14000
Sum utgifter	34800

Resultat	0
-----------------	----------

Kommentarar til prosjektrekneskap:

Rekneskapet for arrangementet er noko mindre enn budsjett på grunn av noko færre deltakarar enn venta, og dermed har både inntekter og utgifter gått ned i høve til budsjettering. Ein anna viktig faktor som påverka er også at vi fekk nytte skulen vi overnatta på kostnadsfritt då Haugesund kommune låner ut skular gratis til barne- og ungdomsorganisasjonar i kommunen. KFUK-KFUM Haugaland er registrert som barne- og ungdomsorganisasjon i Haugesund kommune, og dermed kom vi under denne ordninga.

Lønskostandar som er lagt inn i budsjettet er kostandar knytt til dagleg leiar sitt ansvar for koordinering, planlegging og gjennomføring av arrangementa i samarbeid med frivillige medarbeidarar. Lønskostnadane er estimert med tanke på kor mykje arrangementet kan bidra til dekking av kretsen sine lønskostnadar, og ikkje ein reell sum for kor mykje tid dagleg leiar brukar på arrangementet i form av planlegging, gjennomføring og etterarbeid.